

Fasnecht 2018

Sujet:



Dr Ott dä goht, en neue Chasper im Stadtroot!

Nüt isch beständiger als dr Wandel
Das gränzt teilwies scho an Menschehandel
Dr einti möcht wege viel Geld neueme anderscht ahne go
Und für dr ander duet die Gschicht wieder vo vorne ahfo

Es isch passiert vor über 50 Joore
Dr Luki isch im färne Allschwil gebore
Nach dr Schuel ischer an d Uni Basel go studiere
Täglich hetter sis Hirni mit Soziologie welle ramponiere

Das sind scho einigi grüeni Tendenze
Zuäsätzlich hetter im Botanikunterricht niä wellä schwänze
Kunschtgschicht het euse Luki scho immer fasziniert
Au wennis nüt bringt und au keine intressiert.

Mr het z Lieschtel denn nonig chöne ahne
Das do e Chasper chunt mitere grüne Fahne
Im Joor 2012 isches denn passiert
Dr Luki isch in Stadrot ihmaschiert

Nach dr Krtitik wei mir Ihn mol afo lobe
Denn in dere Zit het er zimli viel bewoge
E riese Projekt e neue Bahnhof wird's geh
Bald chasch all 15 Minute e Zug uf Basel neh

Im Luki sin letschte Wurf die neuu Rothuusstross
Place to be für eus Fasnächtler s grösste Los
Anstatt all 5 Meter durch Baustelle z gheie
dörfe mir nachem Umzug die neue Bänkli ihweihe

13 Mandat füehrt dr Luki gemäss Hompage us
D Helfti kenne mr nid und chömme sowieso nid drus
Was mir aber scho lang kenne isch s Lieschtel Air,
dr Sinn vom Reschte z`gseh fällt eus schwer

Me goht ihne um wieder usezcho
Nach sim Buech lauft er jetzt drvo
Durch d nöchi zur Stadt hät mers scho lang chönne erkenne
Dass er sich eines Tages Basler Stadtentwickler will nenne

Luki viel hesch gmacht in de letschte Joore

Mit dem Abgang hat Lieschtel eine gute Chasper verloren
Eins dühnd mir dir aber ans Härze legge
Du setzt dini Nase nid immer überall ihnestegge

Und scho ischs passiert s chunnt en neue
Mir wüsse nid genau ob mir eus chöne freue,
bim neue Chasper isch s schlimmste dra
Das nid mol eine dr Latz het dörfe ihne ha

Dani Spinnler isch dr neuu starki Maa
De het scho e Sitz sid 2016 im Stadtrat gha
Per stilli Wahl het denn dr Stadtrat entschiede
S einzig wichtig für Sie isch dr Interni Friede

Mir Chnobis säge danke im Luki Ott
Denn das wo du gmacht hesch isch definitiv nid nume Schrott
Ob dr Bahnhof d Rothusstross oder die andere Projekt
Obwohl das mit dr Uni Lieschtel hei mir dir 2016 gsteckt